



Praxis Et Brevis Declaratio Viæ Spiritvalis

Palma, Luis de la

Antverpiae, 1634

Tertius Dies.

[urn:nbn:de:hbz:466:1-60472](#)

TERTIVS DIES.

*De pœnitentiâ exteriore vel corporis
castigatione.*

HAec materiam mirabiliter tractat S. Pater noster in Addit. 10. quæ sequitur primam Septimanam, & sic habet:

D E C I M A, ut aliquam addam satisfactionem, seu pœnitentiam: quæ quidem in interiore & exteriore diuiditur. Interior est, dolor de propriis peccatis, cum firmo proposito cauendi tum ab illis, tum ab aliis quibus suis in posterum. Exterior autem est, fructus interioris, videlicet castigatio aliqua de commissis; quæ tribus potissimum modis assumi potest.

Primò. Circa victum, subtractis quibusdam non superfluis solum (quod tem-

temperantiæ est, non pœnitentiæ) sed etiam conuenientibus alimentis : & eò fit melius quò plus subtrahitur, vitatâ interim naturæ corruptione, aut debilitate graui, seu infirmitate.

Secundo. Circa somni & strati modum, sublati non mollibus tantum aut deliciosis rebus, sed aliis etiam opportunis, quantum licet, citra ritæ aut valetudinis graue periculum: quapropter de somno necessario nihil demendum est, nisi aliquantis per ad consuetudinem (si cui est nimij somni) moderandam.

Tertio. Circa ipsam carnem, ut inflatum sentiat dolorem, admotis gestatisque ciliciis, funibus aut vectibus ferreis, vel incussis verberibus ac plagis, vel aliis austерitatis generibus assumptis: in quibus tamen omnibus magis expedire videtur, ut doloris

F 4 sensus

sensus in carne tantum sit, nec penetret ossa, cum infirmitatis periculo. Quare flagellis potissimum utemur ex funiculis minutis, quæ exteriore affligunt partes, non autem adeò interiores, ut valetudinem aduersam causare possint.

Notanda sunt insuper quatuor hæc circa pœnitentiam. Primo, Quod pœnitentiæ exterioris triplex est usus seu effectus : nimirum ut pro delictis præteritis non nihil satisfiat; ut vincat seipsum homo, inferiorem sui partem, quæ sensualitas appellatur, superiori, hoc est rationi, magis subiiciens : ut postremo quæramus, atque impetramus aliquid gratiæ diuinæ donum, quod optamus ; puta intimam cordis contritionem de peccatis, & abundantiam lacrymarum, vel propter illa, vel propter pœnas & dolores Passio-
nis

EXERCITIORVM S. IGNATII. 89
nis Christi, aut dubij alicuius, quod nos
angit, resolutionem.

Et infrà, post Notandum Secundò,
sic dicit: Tertiò, Quòd quando is qui
exercitatur, affectum quæsitum non
consequitur, ut dolorem vel consolatio-
nem, mutare subinde expedit rationem
victus somniique, & alia genera pœ-
nitentiae; ita ut pœnitentiam vnam
per triduum sectemur, & proximo
eam biduo relinquamus, vel etiam tri-
duo, prout diuersis plus aut minus
pœnitentiae est sumendum.

Præterea cùm pœnitentias huius-
modi sèpè omittamus, ob affectum
carnis aut erroneum iudicium, quasi
naturalis nostra complexio ferre illas
non possit citra ingens valetudinis
detrimentum; & è contrario, iustum
nonnumquam modum pœnitentiae ex-
cedamus, de corporis robore nimis

F 5 con-

confidentes , mutatis , vt dictum est ,
 pœnitentiæ generibus , ac per vices
 sumptis & relictis , euenit plerumque ,
 vt clementissimus Dominus , qui natu-
 ram nostram perfectissimè cognoscit ,
 vnicuique id compertum reddat , quod
 ipsi expedit .

Declaratio Additionis decimæ.

POenitentia exterior , quæ est cor-
 poris castigatio , est fructus pœni-
 tentiæ interioris ; quæ est dolor de pec-
 catis : ostenditque hunc dolorem esse
 verum , quia peruenit ad vindictam de
 offensâ , & ad adhibenda , quæ magno
 constant , remedia , ne ad illam relaba-
 mur .

Hæc pœnitentia habet tres effectus .
 Primus . Satisfacere pro peccatis præ-
 teritis .

Secundus . Vincere seipsum , sensuali-
 tatem rationi subiiciendo , vnde proue-
 niunt vberes fructus bonorum operum
 &

& virtutum, propter tria. 1. Quia ratio caret contradictione sensualitatis ; vel saltem minor ea est, quando corpus castigatur. 2. Quia corpus delicate enutritum recusat labores. Et sicut caro non salita corrumpitur , & vermes generat; sic corpus bene pastum , amicum est otij , temptationum malarumq; cogitationum seminarium . Contrà, corpus bene castigatum lubens se sanctis subdit laboribus : experientiaque nos docet, quòd bestiis & pueris magis sit proprium, rigore & castigationibus, quàm ratione, gubernari. 3. Quia dæmon , qui per sensualitatem hominem plerumque deiicit , seueritate illâ & flagellis facilius vincitur : imò aliqui sunt dæmones (vt ex Euangeliō patet) qui non eiiciuntur , nisi oratione & ieiunio.

Tertius effectus pœnitentiæ est , à Deo Domino nostro gratiam aliquam obtinere & fauorem, eumque vel spiritualem; qualis est dolor, contritio, deuotio, sensus & gustus aliquis spiritua- lis,

lis, &c. vel temporalem ; verbi gratiâ bonam valetudinem , pacem , bonum optatumq; negotij alicuius successum , vel quid simile. Peculiariter verò Sancti hisce pœnitentiis vñi sunt ad obtinendam à Deo lucem in dubio aliquo, vel alicuius quæstionis resolutione : quia quando pœnitentia Orationi inititur, fortior ea fit, vt ex sacris Litteris patet.

Pœnitentia fieri potest tribus modis.

Primo, in cibo & potu , tum quoad quantitatem , tum quoad qualitatem. In cibo , non comedendo fine licentiâ,nec extra tempora,aut consueta loca ; non querendo delicatiora ; non conquerendo de vilioribus cibis ; eosq; & potum usque ad satietatem non sumendo ; in delicatioribus præcipue se mortificando. quæ omnia ad temperantiam spectant , vt videre est in Regulis abstinentiæ & Additione 10. Ad pœnitentiam verò spectat, de quantitate quid tollere , vt conueniet ieunio plus minime arcto aut rigido. Et hæc pœni-

pœnitentia valdè propria est SOCIETATI, cuius quædam Regula habet : *Omnes intelligent, non esse singularitatem, iejunare aliis non iejunantibus, &c.* In potu fit pœnitentia , excessum tollendo in quantitate,& maximè in qualitate vini,cuius non deberet esse usus, nisi per modum medicinæ:omnis enim in eo excessus tentationibus materiam subministrat, accedit iram, stupefacit intellectum , ad Orationem & Exercitia spiritualia torpidum tardumq; reddit , aliaque multa tum corpori tum animæ damna infert. Hoc Exercitium mortificationis circa cibum valdè fuit in usu SOCIETATIS initio.

Secundo , pœnitentia fieri potest quoad somnum : in quo licet nihil de necessario demi debeat, moderatio tamen adhibenda est, ne sit superfluus, præcisè semper ad Orationem surgendo,contrarias omnes necessitates & rationes , nisi benè examinatae fuerint, reiiciendo. Quod ad temperantiam & pœnitentiam spectat , ut etiam asperis
in

in modo dormiendi; verbi gratiâ dormire vestitum, humili cubare, &c.

Tertio, fieri potest pœnitentia disciplinis, ciliciis, aliisque id genus asperitatis & castigationibus; quarum est magna varietas & differentia: & admirandas earum inuentiones videre est in Sanctorum Vitis, de quibus quoad usum & imitationem dicit S. Pater noster in Additione 10. sic: *Circa ipsam carnem, magis commodum & securum videtur, ut inflictum sentiat dolorem incussis verberibus aut plagis, ut doloris sensus in carne tantum sit, nec penetret ossa cum infirmitatis periculo.* Ideò magis conueniens est, se affligere tenuibus funiculis potius quam alio modo, qui notabilem aliquam causare posset infirmitatem. Et quia modus ille agendi pœnitentiam disciplinis & ciliciis iam factus est maximè ordinarius, timendum est ne duorum priorum obliuiscamur, iudicando eos quasi alienos à nostro instituto & Religione; cùm tamen ab eâ verè non sint alieni, & san-

ctus

ctus Pater noster eorum expressam faciat mentionem : deinde fructus ille, qui ex ciliciis & disciplinis colligi solet, non erit is qui exspectari debet, si cibo & potui laxemus habenas, nec iis frenum aliquod iniiciamus. Pœnitentię hæ corporales non possunt in omnibus personis esse eadem , nec omni tempore ; sed esse debent plures vel pauciores.

Primò. Debent esse conformes valetudini corporisque viribus: quia is qui multis corporis miseriis & infirmitatibus affligitur , non debet illas sibi reddere grauiores superiniecto nouo pœnitentiarum voluntariarum , præfertim indiscretarum onere, aut cum anxietate, ne illas non possit explere, sed potius animum suum applicet ad generosè ferendas pœnitentias sibi à Deo immissas.

Secundò. Debet haberi ratio occupationum & laborum ad maius Dei obsequium, ne illi impedianter ; siue iij ad proximi spirituale bonum, siue in temporale

porale alicuius communitatis auxilium
tendant : quia æquum non est , pœni-
tentiis , quæ mihi quidem vtiles sunt,
aliis verò non profunt , corporis vires
debilitare; cùm eas ego impendere pos-
sim laboribus aliis , qui & corpori mo-
lesti erunt, & præterquam quòd spiritui
multùm profuturi sint, in proximi et-
iam vtilitatem redundabunt. Et hoc
intelligendum , quando tales pœnitentia
x, occupationes vtiles impediunt; ali-
quando enim eas & frequenter iuuant,
corpus spiritui & sensualitatem rationi
subiiciendo, vt suprà diximus.

Tertiò. Debet pœnitentia accom-
modari materia Meditationis : maio-
rem enim Meditationes primę & tertię
Septimanæ requirunt, quām eæ quæ in
quartâ fiunt . Ratio etiam habenda
consolationis aut desolationis spiritua-
lis, & deuotionis, aut ariditatis quę per-
cipitur : & vt mediocritatem quis fer-
uet in omnibus istis occasionibus , ex-
pedit aliquando pœnitentias mutare,
maiores vel minores assumendo ; ad
ma-

maiores tamen & seueriores maiori feruore feratur, quia vires suas nemo facilè nouerit, nisi ad extremum & sumnum potentiarum peruerterit. Et in omnibus his optimum est, bono uti consilio, & alterius se iudicio subiicere.

M E D I T A T I O DE PECCATORVM POENIS.

NO T A N D V M P R I M O , Q u ò d i n o m ni peccato duo reperiantur: vnum est, deseruisse Deum, qui ultimus est finis; alterum, inordinato se affectu ad creaturam aliquam conuertisse. in quibus, vt diximus, tota peccati fœditas consistit. Istisque duabus malitiis rigor punitionis & poenae responderet.

Et idem primò id euenit, vt is qui Deum deseruit, sit absque Deo; & qui ultimum suum finem fugit, ad illum non perueniat; & qui ad conuiuum inuitatus ire noluit, ex eo non comedat; & qui à Deo recessit, ab illo Deus recedat. Osee 9. Sed & vae eis, cùm recesserent

G

sero

sero ab eis. Et illam vocamus Pœnam
damni. Secundò, vt is qui se creaturæ
tradidit, damnum etiam cum illâ pati-
atur; & spinis se pungat, qui eas ample-
titur; & is qui crudeli domino seruire
voluit, eius etiam crudelitatem sentiat.
*Isaiæ 19. Et tradam Aegyptum in manus
dominorum crudelium.* Et hanc vo-
camus Pœnam sensus.

NOTANDVM SECUNDV, Quòd ira
Dei in peccatoribus peccatisq; puniendis
valdè similis sit iræ viri alicuius poten-
tis & zelotypi: qui cùm vxorem suam
lautissimè, summoq; semper in hono-
re domi suæ habuisset, summo agitatur
furore, quòd ipsa, eo spreto, cum adul-
tero discesserit: ideoq; Primò, nullius
eam rogatu aut intercessione in domū
suam admittit; & pessimæ ab adultero
tractationi multisq; miseriis obnoxiam
cum paupertate luctari permittit. Se-
cundò, eam violenter ab adultero se-
parat, ne vel breui istâ voluptate ita
amaritudinibus mixtâ recreetur. Ter-
tiò, adulterum occidit. Quartò, vxorem
puden-

pudendâ & ignominiosâ morte afficit: quia, vt dicitur Proverbiorum c.6. *zelus & furor viri non paret in die vindictæ, neque acquiescet cuiusquam precibus, nec suscipiet pro redemptione dona plurima.* Similem modum seruat Deus in punitione hominum, qui, se spreto, qui vltimus eorum finis est, turpibus creaturarum amoribus indulgent. Quæ similitudo in Scriptura sacra in vsu est; vt appareat Ieremiæ 2. vbi clare ostenditur, quomodo hoc sentiat Deus, his seuerissimis verbis: *Obstupescite cæli super hoc, & portæ eius desolamini vehementer, dicit Dominus. Duo enim mala fecit populus meus: Me dereliquerunt fontem aquæ viua, & foderunt sibi cisternas, cisternas dissipatas, quæ continere non valent aquas.* Porrò ad clariorem iræ Dei punitionisque intelligentiam iuuabunt sequentia.

CONSIDERA PRIMO, Maximam demonstrationem odij, quo in peccatum fertur Deus, fuisse in Angelis, quos de-

G 2 cx-

cēlis propter vnicum superbię peccatum
in infernum præcipites dedit. Vbi val-
dē notandum , quod pretiosissimum
domus Dei monile , præcipua cæli to-
tius pulchritudo , & quæ speciosissi-
mum Deum maximè referebat imago,
propter vnicam superbię cogitationem,
velut fulmen è cælo delapsa est ; atque
adeò ex Principe Angelorum factus est
Princeps dæmoniorum , ex speciosissi-
mo omnium turpissimus, ex gloriosissi-
mo omnium afflictissimus: qui gratissi-
mus erat , factus est omnium hostium
Dei, qui aut sunt, aut umquam futuri
sunt, maximus . Porrò si huius cladis
in aureis illis vasis pretiosissimis una so-
la culpa causa fuit ; quid de vilissimis
vasis luteis,tot peccatorum veneno ple-
nissimis, exspectandum?

CONSIDERA SECUNDO, Alterum di-
uinæ iustitiæ argumentum exhibitum
fuisse in paradiſo terrestri; vbi primum
hominem ad suam Deus imaginem &
similitudinē creatum collocauerat, om-
nium hominum parentem ac caput,gra-
tiā

tiâ & iustitiâ originali , immortalitatis
quasi veste, aliisque innumeris excellen-
tiis & priuilegiis ornatum: quem Deus,
propter vnam inobedientiam ex para-
diso in exilium relegatum , ad infirmitas
pœnas & miserias, ad mortem denique
condemnauit. Nec hîc diuina stetit iu-
stitia : eadem enim pœna omnes Adæ
posteros inuoluit; qui ex radice infectâ
nascuntur filij iræ, in peccatis concepti,
iisdemque sunt obnoxij miseriis. Nec
post tot sæcula ea est obliuioni mandata
iniuria, licet inter tot homines distribu-
ta , tantisq; pœnis castigata : quinimò
quotquot ab orbe condito huc usque
homines flagella passi sunt, & quotquot
mortem obierunt , & quotquot in in-
ferno animæ ardent, ardebuntque per-
petuum, sunt quasi scintillæ ab hac pri-
mâ culpâ originaliter prouenientes, di-
uinæque iustitiæ clarissima testimonia .
Quas ergo pœnas & flagella meretur &
timere debet homo vilis , propter tam
varia quæ commisit peccata ; cùm pro-
pter vnicum solum, in eo qui omnium

G 3 ho-

hominum pater & caput erat , tot ex-
stent seuerissimæ iustitiæ diuinæ argu-
menta ?

CONSIDERA TERTIO, Ut homines à
nouis peccatis non destiterūt, sic Deum
à nouis flagellis immittendis non desti-
tisse. Totum vniuersum miserè diluuiio
periit. Super quinque illas infandas ci-
uitates ignem & sulphur de cælo pluit
Deus. Core, Dathan & Abiron, cum
Moysè impiè concurrere volentes , vi-
uos terra absorpsit . Duo filij Aaron,
Nadab & Abiu , propter omissam ali-
quam in sacrificio cærimoniam , igne
Sanctuarij subitò extinti sunt. Ana-
nias & Saphira in nouo Testamento ob-
mendacium , quod primo intuitu leue
videbatur , inopinatò mortui sunt . Et
huiusmodi in diuinis Litteris & Histo-
riis, tam sacris quam profanis , plurima
occurrunt exempla , aliaque quæ ipsi
hisce nostris temporibus quotidie vide-
mus . Iuuabit hæc nonnumquam in
memoriam reuocare, & cogitare, quod
plurimi , ob minora paucioraque pec-
cata

EXERCITIORVM S. IGNATII. 103
cata quām quā nos commisimus , per-
petuūm in inferno ardeant.

CONSIDERA QVARTO , Om-
nia iustitiæ Dei erga peccatores esse
plenissima : affigit enim eos Primò ,
cæcitate, ignorantia , tenebris spiritua-
libus , inquietudine animæ & spiritus,
remorsu conscientiæ, vt sint tamquam
homines, qui extra centrum suum ex-
istentes, nusquam firmitatem ac quie-
tem inueniunt. Quę omnia ad pœnam
damni pertinent , respondentq; deser-
tioni Dei, qui est vera lux, gaudium &
centrum cordis. Secundò , affigit eos
infirmitatibus , paupertate , infamiâ ,
litibus , aduersis casibus , & luctuosâ
morte , &c. (ita nimirum illis à rebus
creatî soluitur) respondentque pœnis
sensus : quibus si addas impatientias ,
diffidentias & desperationes quibus ve-
xantur, erit quasi species aliqua inferni.
Cùm ergo tot intra & extra nos ira Dei
argumenta percipiamus , cur eum non
timebimus? & iram eius contra peccata
non apprehendemus ? Si iudex aliquis,

G 4 qui

qui seueritatis suæ & iustitiæ reos puniendo frequenter signa dedit, malefactoribus ita horrore sit, ut in ipsius conspectum prodire non audeant; quomodo nos coram Deo apparere audebimus, qui tot eius & tam frequentes iustitiæ effectus tamque manifestos experti sumus?

CONSIDERA QVINTO, Huic pœnæ aliam in hac vitâ succedere, quæ est mors. Vbi supponendū, quod omnibus hominibus certò sit moriendum; verum incertissimam esse mortis horam, etiamsi hinc spem faciat, quod post multos annos futura sit, inde spem diuturnioris vitæ præscindat. Vbi ergo ocyùs seriusq; ea hora venerit, animaduertendum quo in peccatorem Deus rigore vtatur, omnibus eum bonis, amicis, officiis & dignitatibus, omnibus suis recreationibus, pulchritudine, & corporis viribus, & tandem, quâ nihil charius est, vitâ ipsâ spoliando: sic eum generali vnâ omnium suorum bonorum confiscatione puniens, & ab omnibus,

qua-

quarum ipse amoribus irretitus viuebat , creaturis violenter eum , absque spe vñquam ad illas redeundi , separans ; ne vel ad tempus transitoriā illâ se voluptate oblectare possit. Cùm ergo tali modo à creaturis auellendi simus , quare nunc tantoperè illis adhæremus , nisi fortè vt tum in illâ auulsione plus doloris & pudoris sustineamus ? Quòd tum misera illa & infelix anima fugiet? quod tum refugium , quemque protectorem , cùm Deo in iudicio particulari tot grauata peccatis offeretur , inueniet? grauissimè tum accusabitur , quòd inuitata dum viueret ad Dei gratiam , & vt ei reconciliaretur , venire contempserit ; & tum iustè à Deo deseretur , quæ Deum iam prior deseruit : sicque à Deo misere fugabitur expelleturque , nullius vñquam intercessione redditura . *Quia zelus ac furor viri non parcet in die vindictæ , neque acquiescat cuiusquam precibus.*

CONSIDERA SEXTO , Hanc pœnam sequi aliam non minùs grauem , quæ est

G 5 iudi-

iudicium vniuersale : postquam enim Deus creaturas suas tulerit sustinueritq; propter Electos , in illo die iram & furorem exacuet in odium adulterij malorum, & in peccatorum , quæ propter illas commiserunt , vindictam . Sicut maritus in die vindictæ quam de adulterio sumit , occidit adulterum , vestes omniaque pretiosa comburit , hortos euertit & destruit, omnemque iram & furorem in omne illud quod iniuriæ infamiaeque ei irrogatae quoquo modo particeps fuit, effundit ; sic erit in die illâ: huc enim refertur terræ motus, mugitus maris, solis obscuratio, stellarum lapsus, & totius mundi exustio . *Cùm igitur hæc omnia dissoluenda sint, quales oportet vos esse in sanctis conuersationibus & pietatibus, exspectantes & properantes in aduentum diei Domini, per quem cæli ardentes soluentur, & elementa ignis ardore tabescant?* 2. Petr. 3.

Et, quod mirandum est, cùm omnia illo die consumentur , sola hominum corpora resuscitabuntur & regenerabun-

buntur ; quia cùm maximè participarint de offensâ Dei , eiçue causam derint , æquum est ut hoc non solùm luant pœnâ mortis æternæ , sed & viuant , quo mortem eam æternam sentiant. Maiórne Dei ira esse potuit, quâm quòd non tantùm vitam tollere , mortemque immittere voluerit , sed quòd mortuis vitam det, vt sic viuâ eos morte puniat ? hoc enim modo occidit & consumit, nec tamen mortis ipsius sensum & dolorem tollit . Hinc sequitur Iudicis sententia,in quâ de tam variis & multiplicibus peccatis rei facti , omnibus , à maximo usque ad minimum , benè perpensis & examinatis, aliam pœnam non accipient , quâm eam quam ipsi sibi suis peccatis præscripserunt: quę est 1. à Deo in æternum reiici , quem ipsi spreuerunt, & deseruerunt. *Discedite à me maledicti.* 2. Damnum creaturarum sensu percipere, quas ipsi amarunt. *In ignem æternum.*

CONSIDERA SEPTIMO, Horrendam istius pœnę executionem, quę fiet in inferno

ferno per totam æternitatem: vbi maximum tormentum erit, versari in perpetuis tenebris, separari ab ultimo fine, à quo ipsi voluntariè recesserunt, ad quem tum, vt vellent, non poterunt reuerti; cum perpetuo remorsu & dolore, quòd tantum perdiderint bonum, & tam insignes illud consequendi sibi elabi sint passi occasiones. Hinc sequitur pœna sensus: quâ, iusto Dei iudicio, creaturæ omnes, quibus in hac vitâ fuit delectatus, ipsum cruciabunt, & sensus, qui eius voluptatis fuere instrumenta, iam erunt tormenti. Vnde magna se offert materia considerandi omnia quæ in hac vitâ valdè affligunt & pungunt sensus: illa enim omnia maiore vi & impetu in damnatos in inferno irruent. & hæc est vindicta quam Deus sumet de iis, qui, se spredo, creaturas amplectuntur. Nec hæc tragœdia finem capiet per totam æternitatem.

CONSIDERA Octavo, In hac punitione non respicere Deum personas, nec multis

multis opus esse peccatis : vnum enim peccatum mortale ad omnia dicta tormenta sufficit. Et in hoc vim facit sanctus Pater noster in omnibus Punetis Exercitij de tribus potentiis ; cum unicum Angelorum peccatum eos demones fecerit; unica primorum parentum inobedientia tantam in mundo stragem ediderit : qui & ipsi easdem illas æternas sustinuissent poenas, si poenitentiâ culpam eam non diluisserent. Et propter unicum peccatum mortale, multi iam ardent in inferno : ut hinc certò sciamus , cum tantus sit nostrorum defectuum excessus , & tanta personarum nostrarum inæqualitas, nullam nos vanæ alicuius præsumptionis ansam habere ; sed necesse esse , ut per veram poenitentiam securos nos reddamus.

Finis ergo huius Exercitij
Primus est, Timor Dei: quia *horrendum est incidere in manus Dei viuentis.*
ad Hebr. 10.

Secundus, Opportuna ac velox cum
Deo

Deo reconciliatio , qui nos in gratiam recipere paratus est: iuxta illud Ieremias 3. Vulgo dicitur : *Si dimiserit vir uxorem suam, & recedens ab eo , duxerit virum alterum , numquid reuertetur ad eam ultrà? Numquid non polluta & contaminata erit mulier illa?* Tu autem fornicata es cum amatoribus multis ; tamen reuertere ad me , dicit Dominus , & ego suscipiam te.

QVARTVS DIES.

De fine primæ Septimanæ, & initio secundæ.

Finis primæ Septimanæ est , contrito & dolor de peccatis commissis, & animæ purgatio ab iisdem : & sic pertinet ea Septimana ad viam quæ vocatur Purgatiua, sicut dicit S. Pater noster in Annot. 10. inter 20. primas. Media, quibus in illâ utimur, sunt, Examen conscientiæ, Confessio, Pœnitentia vel corporis castigatio, & Meditatio. Materia Meditationis est,

1. Finis